



淮關統志卷之十一

文告

淮權章程大備業已具載令甲等冊矣而人情趨利如鶩往往玩禁翫法變詐百出莫可究詰司權者苟非隨事體察悉心釐剔鮮有不墮其術中者因復爰舉歷任移咨禁約而會輯之用資參考非徒陳已往之具文正以勉將來之寔政也志文告移行

咨呈江督安撫各院文

杜琳

爲違禁蔑憲私抽蠹國事本年正月十四日



據張瑞趾首前事等因到司據此查淮關連年缺額寔由盱澗遶漏是以本司奉差之日即以請禁豫省船貨遶道等事呈請

本部堂移咨

督撫各部院續蒙示禁在案詎料盱眙奸棍唐新宇等抗不遵依仍然私立櫃簿每石客貨抽店用銀四分出店小梁銀二分六厘不繳官不解部名為公費於示禁之後復包攬由淮客船五十六隻又查得澗溪奸棍李仲華楊振生潘玉祝亦復公然卸貨群蠹私抽似此光棍包攬船裝下淮貨物強

起由陸私抽虧課其與當年翟家壩已經正法之光棍梁藻無異為此據詞呈報

本部堂 本部院 本都院伏祈

鑒照事干光棍違 憲私抽有關額課情由具疏題叅親提嚴究追贓正法永行勒石釘椿禁止庶額課不致越漏而光棍知所做畏矣

咨呈總漕部院文

為淮關走漏之多運弁夾帶尤甚懇賜嚴究以足額課事切照淮安三關歸併額賦繁重所賴南北河豆麥棉花油果醃臘等貨以及南來茶布蘇杭

襍貨以充

國課其自南河一路棉花油襍等項已被鳳關於盱
眙澗溪地方攔截登陸竟無纖毫南下雖奉部
行鞭長莫及視如故紙其自山東一帶醃臘魚猪
襍貨又被廟灣同知勾引下河等處繞道而去止
有南來一線稍可補苴萬一豈意茶布襍貨盡遭
寧紹各幫不法運弁從地頭恣意包攬以重運北
上勢同哨聚莫敢顧問惟是浙紹漕船悉皆艨艟
大艘無不滿載而上何堪有此漏卮關稅連年缺
額積弊難返本司滿擬竭力殫心以盡職守無奈

奸惡橫行力所不制漕船絡繹難以枚舉即如紹
興衛前幫運弁周士美名下旗船夾帶茶貨并蘓
杭襍貨不計其數行文申飭抗不遵依似非光天
化日之所當容也且時值南熟北歉商賈不利客
販星稀所過者非南來之撥兵即回空之兵舫日
對河干臨流嗟嘆錢糧若此豈堪前項棍徒肆橫
鷓張明彰侵蝕伏乞

本部堂俯念

國課攸關即賜嚴追補納幸甚

咨揚關文

瓦哩哈

爲盱澗地棍勾引繞道侵課會同招商以全
國賦事為照淮揚兩關惟指南河出產豆麥棉花油
餅等項貨物自正陽等處裝載由淮抵揚輸納
正供近被盱澗地棍勾引奸商遶道竟從澗溪盱眙
盤山至三岔河六合南去偷漏淮揚兩關是以前
任監督俱致缺額今本部蒞任愈見商販寥寥細
訪其由盡屬盱澗地棍勾漏深為駭異隨差查看
果見該處奸行貨積如山車驢絡繹是淮揚兩關
之課盡飽盱澗奸牙之腹除一面咨呈
安撫都院給示嚴禁外今特遣役前往正陽臨淮

等處遍諭寬減稅貨數目給票招商以冀檣帆雲
集但淮揚兩關唇齒相倚諒

貴部寬商惠旅定有同心祈將寬減數目刊布小
票星速差役前往正陽臨淮協同招諭為此合用
手本前詣

貴部請煩查照仍祈
見覆施行

咨覆安徽藩司文

鄂穆索

爲詳請明示事本年八月十一日准
安徽布政司常 咨開康熙四十年七月二十日

奉

總督部堂阿 批該本司詳據鳳陽府詳議盱邑
蔣家壩不應徵稅緣由奉批據詳翟蔣二壩原係
鳳屬盱眙地方附近居民買賣糧食以供日用淮
關巡役自不應越境滋擾但該地方從前既無徵
稅之事而該關人役寔於上年始赴巡查是何緣
故且據盱邑具詳淮關批有訪知彼地寔屬漏卮
之語又飭發關示於翟蔣二壩嚴禁客船過壩偷
漏則該關似不能忘情於此地夫巡查口岸必率
由舊章不得擅為增減須確查得寔庶免日後游

移仰司徑移淮安關查明妥議另詳報奪仍候
撫院批示繳等因到司奉此相應移會希查翟蔣
二壩是否所轄之地從前曾否在於盱邑翟蔣二
壩徵稅令其巡查示禁是否率由舊章亟賜查明
移覆過司以憑轉詳等因准此為查淮關額設口
岸內有周家閘一口即今之周家橋徵收騾駝錢
糧按季造報 糧部之項因該口逼近翟蔣二壩每
多奸商盤壩偷漏向例飭令周橋巡役兼巡只查
禁其過壩從不徵收稅銀所以歷來各關部循例
而行並非前任上年始赴巡查也再查康熙三十

八年十月內前任關部馬 因六壩未堵之時有
商貨船隻在於決口出入是以詳請

前任總河部院于 批准暫行就近收稅後於康
熙三十九年六月內奉

總河部院張 題准奉

旨不准商船出入即行停止其周家橋徵收旱路騾駝

錢糧仍照往例並未一概停止也舊年前關邁

於蒞任之始訪知彼地大載貨物公然盤壩越漏

錢糧周橋之一二巡役莫敢如何難以禁止所以

出示嚴禁又行文盱眙縣飭禁在案若本地水淹

難民買賣日用糧食不但例無鈔稅抑且

皇恩尚恐撫育不週豈有為臣工者敢有例外之求乎

揆之為牧民之職者必皆愛養子民為重或有奸

商冒稱居民飾詞艱苦希圖弛禁以為偷漏地步

亦未可定但本部於本年六月二十一日蒞任以

來察知難民積苦奸商狡猾即行分別卹禁併嚴

飭巡役照舊巡邏不許擾害諄諄告誡業已三令

五申又經出示嚴禁翟蔣二壩不得盤壩越漏皆

遵舊例今查翟蔣二壩固非收稅之地寔乃淮關

漏卮必須巡查之處若此地擅為停止巡查則淮

關額賦每年一十五萬有奇之稅銀藉此偷漏不可勝言矣今准前因相應查覆為此合咨貴使司煩為速賜妥議轉詳施行

詳 總河部院文

朱人龍

為敬陳分納船單之法以杜借單影射事竊查船戶輸納淮倉漕造項下抽分船單向例每年於新監督任內納單一次聽其時常來去者也其如歷來多有奸頑船戶勾通不法鈔戶竟不輸納船過關時即於熟識船中假借納過船單之名具報名曰借單在監督安得船船而辨之如此隱漏

國課一年之內不知凡幾此等積弊何堪一日姑容且更有輸納一單終年止過關一次者豈非苦樂不均惟裝載船隻以其往來次數甚多仍照舊例每年輸納一次聽其頻來頻去外此裝貨船隻查閱舊單如南河山船每年過關不過二次竟有止過一次者其餘船隻每年過關不過四次或止過三次者今特立分單之法飭知各船戶遵照而行寔為至公查向例裝一百石者納四尺單裝二百石者納五尺單裝三百石者納六尺單無論是何船隻凡裝三百石外者概納六尺單四尺者納銀

六錢四分五尺者納銀八錢六尺者納銀一兩六錢今後南河山船分二次納但查南河山船從無裝三百石內者俱應照六尺單分納每過關一次止納銀八錢其餘各色船隻分四次納每過關一次四尺者止納銀一錢六分五尺者止納銀二錢六尺者止納銀四錢總之每過關一次必納分單一次在船戶所納無幾最易為力而一年止過一次之船亦沾少納之惠如此截長補短則國課不致欺隱而借單影射之弊自除矣是否允洽未敢擅便相應詳請

憲裁批示遵行為此備由具呈伏祈
照詳施行

咨呈 兩江督院文

唐 英

為據寔陳明事本年三月初六日據委員陳克濬申報卑職奉委監同關役查收衆興集抽分一項無如在集商民堅以奉

旨

恩免為辭全不納稅目下正當糧船盛行商民既不納稅則正項缺額卑職有負憲委等情據此切照春間重運糧艘過淮自江廣附帶竹木板片釘鐵油蔴糖紙籐繩磁器等貨沿途下卸客商販買例

輸准廠項下 工部抽分錢糧准關循例差役各就卸貨馬頭稽徵自康熙三十年間以至今日存有案卷可查前據桃源縣詳據俛三光等混指抽分錢糧為落地稅具文請免當即據詳呈明本部院裁示並批行該縣糧船附載客貨起卸者例納抽分係准廠項下正額錢糧止於糧艘北上時各就船所卸貨之地抽收船過即撤並非落地稅也查該縣既請裁革關稅正額原未議減似此得毋有損

國課仰再逐一確議去後詎衆興集不容巡役稽查現在停徵而糧船北上衆興之卸貨者滔滔不絕在該縣必以為已經通詳聽候酌議但文檄往返旬餘半月尚難定議轉瞬糧船過完客貨頃刻星散此時雖令稽徵亦已無及何敢坐視茲又據委員陳克濬申報前由相應亟請

本部院嚴飭該縣速諭商販凡買糧船下卸貨物並非落地稅照舊按則輸納抽分錢糧倘有地棍阻撓致虧額課者嚴拿按律招擬詳解究處庶錢糧無缺而關政亦肅矣

咨呈 兩江督院文

準 泰

爲陳明河道事本年五月初三日據軋東守口人
役稟清溝乃通商之處於乾隆二年奉淮揚道詳
委彭縣丞釘椿以杜走漏今奉憲挑濬漁濱河接
壤清溝出口河道告竣開壩清溝所釘椿木被人
拔去等情據此案查清溝口為漁濱河洩水門戶
下接馬家蕩商販貨船木植等物多從此處偷越
寔為軋東之漏卮所以前關年任內設巡船一隻
撥役稽查後巡船裁撤前關唐呈請
各院檄行淮揚道酌議釘椿使之通水而不通船
既杜偷漏之弊又開宣洩之門於權政民生兩有

裨益當委山陽縣縣丞彭存仁釘椿二排交與該
處地保看守取有甘結在卷今漁濱河挑濬深通
而清溝更為商貨出入之所前釘椿木若非堅固
嚴加看守則彼地牙棍皆可包攬侵漁將來船貨
皆可從此偷越軋東稅口幾為虛設據稟椿木二
排被人拔去殊干法紀除行阜寧縣查究外相應
咨會

貴都院查照檄飭該縣研訊地保根究拔椿之人
按法處治仍希飭行該地方官委員照舊排釘並
確議作何嚴加看守務使不致偷拔以杜侵擾走

漏庶輒東錢糧大有裨益叨藉舟誼不淺矣
咨准揚道文 高 恒

為咨會事案照時屆伏汛洪澤湖水漲發五壩內
可通舟楫之處誠恐南河重船或有無知商販及
船戶牙埠人等乘此偷漏異圖僥倖或將豆貨運
貯蔣家壩舖戶行內潛由閘河直達高寶等湖南
下躲避關稅查淮關每年額稅全賴洪澤湖南河
米豆船隻稍有越漏即致缺額業經本關咨會
貴道飭禁在案今汛水漲發之時恐日久禁弛復
有前項情事或竟由滾水壩可通之處直達高寶

邵伯等處

國課攸關所當亟為嚴禁除一面飭行該廳查禁外
擬合咨會

貴道煩為查照希即轉飭所屬印汛地方各官速
即出示曉諭一體查禁俾商賈知所儆戒而
國課亦有攸賴矣仍祈將轉飭查禁過緣由
賜覆施行

咨呈 兩江總督文

伊拉齊

為付送事乾隆二十一年六月二十二日准
貴部堂咨查貴州銅舫船隻過關應納單料作何

勻派查運銅如係僱募民船即將應徵船單銀兩在關完納其餘剩銅錫鉛舳按照准關稅則計担科算正耗報部無庸勻派至號船站船裝載者例不在關納單倘有餘剩則照所裝船隻樑頭每隻徵六尺正單一兩六錢火耗一錢六分按其船隻多寡統計應徵船單正耗若干於該員所解正備餘剩數內合算均派每担應徵船單正耗若干分晰報部轉咨

崇文門同該員應完稅銀一併徵收相應咨覆為此咨呈

貴部堂請煩查照施行

咨覆 總漕部院文

伊齡阿

為照會事本年五月初一日准

貴院照會內開因江廣漕船裝載土宜木植吃水過重必須清江以上即行起剥免其報納等因准此查定例漕船北上報納抽分錢糧分設七口歲有比較其分設之口又以清江天妃一帶為商販彙集交易之所貨一離船即滋隱射之弊是以向來定例於此地起卸上岸者俱應遵例報納以衛稅課且此際黃運交暢與宿遷一帶情形大不相

同若此時一開此端不特本年抽分無着且下年復援照本年之例沿路攜帶木牌堆積貨物卸賣不但難以稽察勢將無所底止此亦司其事者所不得不熟籌者也為此詳查水勢卸賣情形據寔咨呈祈請

貴督院俯念漕運關務俱關緊要既可兩便似無庸更張成例致啟釁端寔為公便施行

咨覆 總漕部院文

為照會事本月二十五日准

貴督院照會內開本年回空幫船甚為遲滯嚴督

催備全賴前後跟稍方免遲悞今據標下中軍副將稟報草壩空船俱係銜尾惟淮關查稅因奸丁納稅延挨似覺稍遲有力完納者自必急公報納乏丁竟有一時無措必致停延阻悞可否將查稅單註明後幫船過竣咨院飭令糧道扣解庶漕船得以迅速前進等情到本督院據此查該將所稟似亦迅速回空之意除通飭在後各幫一體遵照候示外請煩查照轉飭管關員役凡遇空船到關即查明逾額貨物應完稅銀若干據寔註明稅單俟空船過竣移咨送院以憑分飭各道照數解還

俾免阻悞仍祈見覆等因准此為查本年回空糧船本關久經嚴飭查船丁役按幫迎至清江分頭迅速查報如有應納貨稅錢糧當即收納並不許片刻耽延現計過關者六十七幫計三千四百九十九隻俱係隨到隨查隨放並無一船稽阻今據該將所稟如有寔在無銀完稅者許將杆查貨單彙送

貴督院轉飭糧道按照旗丁姓名扣解等情但恐一船既准掛欠而衆船效尤所載客貨事關錢糧且淮關如是辦理下游各關應否一體辦理本監

督未敢擅行更張成例前准

督閣部堂咨會當即據寔聲覆在案今准

照會除再飭查船丁役俟回空糧船抵關遵照前飭隨到隨查隨放毋許片刻停留外擬合咨呈貴督院請煩查照施行

咨呈 兩江督院文

寅 著

為請禁繞越之弊以足稅額事為照設關徵稅凡南北往來貨物俱有一定經由之路所以各處關口亦有一定稅額此

國家立法徵課之本意也若商販任情繞越巧為規

避則是故違

功令虧絀 國帑法在必懲難容宥查淮關設立
運河口地方為南北往來扼要之區凡自西北豫
東兩省南下之貨及南河安徽鳳穎往南貨載俱
應由淮關南下所以向定額稅二十餘萬雍正年
間盈餘至二十三萬如有虧短例干議處着賠今
本關自上年十月十二日接徵起至今八個月較
比上年月日已短絀銀五萬餘兩若較雍正十三
年已絀至八萬有奇 國課攸關所繫匪細即經
專差丁役前往各路查訪繞道走漏之處茲據覆

稱鳳陽澗溪口有奸牙猾販由崎嶇山路安設站
鋪包裝包卸由盱眙往南至河稍橋古城鎮至三
岔河鎮市至浦口馬頭下江不由洪澤湖至淮以
避淮關之路又由河稍橋至澗溪自來橋到來安
縣至施官集亦至三岔河又由自來橋至白塔鎮
係盱眙縣地方至竹鎮亦達三岔河俱可下江又
自盱眙東行由汜江至天長縣馬頭下江亦有由
支河到儀徵下江而去俱被繞越淮關其安徽鳳
穎南來襍貨本亦由洪澤湖過淮今被奸牙勾引
亦俱由各處馬頭盤山往北又固始等縣與鳳穎

接壤棉花藥材等貨亦由該處潛越寔係淮關之漏卮等情據此查澗溪原係鳳陽口岸有峻嶺阻隔不通大道前因奸牙勾串商販盤山逾越於康熙年間即經各前任咨請

撫兩院通行示禁有案今奸牙竟敢開出山徑設立站舖勾串商販盤山繞越有自浦口下江亦有自天長下江或由六合支河直達儀徵下江各處皆有船埠馬頭貨載絡繹其鳳穎等屬與豫省接壤西河之釘鉄棉花礬城等貨亦由澗溪盤山往南寔為淮關之漏卮若不請嚴行示禁必致額稅

大虧 國課攸關難容緘默相應呈請

閣督部堂俯賜即飭各該地方官嚴禁奸牙毋許勾串客販盤山繞越規避淮關稅課倘有不遵照例懲治一切轉運貨物俱由正道而行則額課可以無虧而奸牙猾販亦可以知儆矣

咨呈 總漕部院文 伊齡阿

為咨會事乾隆四十二年七月十四日准

貴部院咨開據鎮江府稟稱竊照江浙各幫漕船經由徒陽運河每虞淤淺是以按年分別勘估挑浚然必俟各幫回空受兌之船全數過竣後始可

築壩興挑若回空稍遲則為期促迫應請嚴飭帮弁督令旂丁行抵淮揚二關除例帶土宜外若有多裝貨物例應按則完稅向來總俟通帮貨物查畢稅銀完足然後放行不無守候應請帮船到關查明貨物如有應完稅銀着留各本船丁舵在關交納將帮船先為放行庶免遲滯等情擬合咨會請煩查酌可否轉飭守關員役俟各帮空船一經抵關即賜隨到隨查隨即催令開行如有應完稅銀酌留丁舵數名在關交納毋任全帮株守遲誤仍祈見覆等因准此案查每年各帮回空漕船於

進口下閘時據投帮丁花名到關本關即飭預派丁役一俟該船抵關逐船扞查除例免土宜外如有應稅貨物即令照則輸納催令開行雖在昏暮夜半亦必啟關飭放不許逗遛關上歷年稽催辦理均無延悞惟查各帮回空漕船所載貨物或係丁舵攜帶或向客販攬裝若於該船放關之後僅留丁舵恐致客貨無着錢糧難以徵收將來惟有再行嚴飭本關員役一俟帮船抵關即刻扞查如有應稅貨物立飭報納開行不許片刻稽滯致悞漕限並請

貴部院轉飭押運員弁并催漕汎弁一體查照催
儻毋任藉延似此則漕務關稅均有裨益矣

行海州文

爲繞越有憑等事乾隆四十二年十月十八日據
該州莞瀆鎮民人王大德呈稱身於乾隆四十年
曾將奸牙勾包棍販繞越汎官護送出洋等情節
冒昧呈首原圖裕課利民不意返遭陷害致入囹
圄後蒙釋放而其害未除含冤難瞑今查响水口
有大伊山鎮人吳公盛併住海州之陸雲峰等六
家朋充寫船行包載出口身已於九月二十六日

在雙港地方獲得駁船二隻一名唐明遠一名周
永盛舵工何萬國客係海州沈姓更見卞家堡泊
有豆船數十隻現未開行似此船載分明繞越屬
寔若不叩查究禁則海贛沐安之貨盡從洋去必
致賦額有虧身情願協差查拿以見虛寔等情據
此查海沭贛安等處出產豆麥稞糧有並不經由
淮關設口地方往來售賣者向聽民便從無概令
赴關納稅之例即或該處果有奸牙勾串南下貨
物遠越偷漏情事本關部早已照例稽察不容輕
縱何煩局外民人協差查拿且查該民人前因攔

截客載訛詐多事曾經該州查訊收禁責懲何得
不知改悔仍復肆行妄瀆並牽扯舊案多人希圖
拖累洩忿刁頑已極除批飭該犯速宜安分毋干
重究外第响水口與卞家堡均係出洋要道該處
果否寔有奸牙勾誘南下大載貨船遠越出海抑
或止係本地零星出產襍糧往來銷售一任棍徒
巧借關稅名目任意訛索滋事殊干未便合行飭
知為此牌仰該州官吏即便遵照確查有無本應
來關輸稅之貨竟為奸牙勾串出海據寔具報察
奪如係本地運行土產亦不得任聽棍徒滋事擾

累商民毋違須牌

示諭

禁擾行舖

為曉諭事照得本部欽奉

杜琳

特簡權理淮關本部性甘淡薄所有日用一應薪水等物俱發現銀照依時價平買並無短少絲毫誠恐買辦人役藉倚本部名色在外賒取行舖貨物或扣剋短少價值俱未可定合行出示曉諭為此示仰行舖人等知悉嗣後如有前項等弊許即指名具稟本部以憑立拿嚴究枷示決不姑宥特示

通行棹船

為曉諭事照得橋船之設原係隨時啟閉以杜偷漏貨物今查淮河一綫上自清江下自淮城小船往來若俟開關不無等候合行曉諭為此示仰士民人等知悉凡南北往來乘座小棹船隻如果止裝人載即於小關橋內往來關役驗明無貨即過如有貨物着令自報錢糧需索分文察出重究不貸

戒飭家人

為曉諭事照得本部家法素嚴一應僮僕無不兢兢守法猶恐在外賭博宿娼酗酒生事賒騙酒食

財物俱未可定合行曉諭為此示仰商民人等知悉凡有前項事情許即扭稟本部以憑立斃杖下爾民慎勿畏懼容隱如果稟報得寔定行優賞

清查冗役

為清查冗役事照得衙門人役自有定例豈容濫冒本部莅任以來矢志清釐合行查察為此示諭本關各役知悉如有前任內犯事革出及已經報憲裁汰者不許改名易姓復入衙門其現在人役限三日內各具花名彙冊呈遞伺候本部親點酌留差遣如有隱佔鑽充指稱關役名目在外招搖

一經察出定行嚴懲不貸

嚴禁白棍

為嚴禁白棍以肅關政事照得本部新膺

簡命蒞任准權惟以惠商愛民為心一切應稅貨物自

當照例徵輸其淮地驢駝肩負不過零星食粟任其往來並無羈阻近訪有等白棍假冒巡役肆意索詐魚肉鄉愚殊干法紀除一面訪拿嚴究外合行示仰商販人等知悉嗣後驢駝肩負零星食粟本部寬爾輸稅任其往來倘有前項棍徒假冒索詐或被鳴稟或經訪聞定行嚴拿立斃杖下決不

姑貸慎之

嚴禁鑽刺討關

為嚴禁鑽刺討關以裕

國課事照得淮關額課全賴南北商艘輸納鈔稅近有無籍棍徒在於河口裡外地方哄誘商賈凡有貨船到淮或勾引各衙門假借批牌或串通各執要捏稱已物鑽謀討關希圖侵蝕分肥相習成風殊干法紀本部素性愚直不趨權要况

勅書開載不許王公大人倚勢討關

煌煌天語炳如星日敢不凜遵且爾商賈聽其愚誘

鑽謀情面希圖省減未免胆怯心惶自担驚畏及本部不准情面照例批納而討關者又藉言貨物原多更加索取况一切火耗陋規宿弊久經禁革爾等皆當仰體本部寬恤商賈至意凡有貨船竟赴關輸納既無羈滯又無驚恐除一面密訪拿究外合行出示嚴禁為此示仰商船人等知悉嗣後如有前項棍徒勾引說合討關本部定行按法拿究詳解 內部在奸棍希圖蝕課自干受法爾商賈攜資貿易毫無所省反受拖累噬臍何及法在必行各宜凜遵

嚴禁包攬

蔣洪緒

為嚴禁包攬

國課以疏商路事照得本部承乏淮關兢兢夙夜竊念

國賦之盈虧視商船之多寡商賈之通塞在利弊之興廢在商攜資覓利貪風宿水拋離鄉井跋涉道路閱歷如許艱辛止為蠅頭之計乃關津為利之藪寔亦為蠹之叢凡有商船到關即有不法棍徒簧言攬誘或稱打點或稱線索將多報少以細作粗一入殼中視為奇貨煢煢孤旅莫敢誰何更有

白棍假冒巡役凡到隘口勒索飯錢不知是真是假居然為虎為狐任其侵漁弱肉強食更設常例尖嘴過關名色通同蠹役指詐肥囊嗟嗟商船不知幾許剝削始得過關本部加意興釐立除積習除已往不究外合即禁為此示仰商船人等知悉嗣後爾等到關自行自填貨數照寔開報當堂交兌親註紅單點名過關並無旁阻倘有不法棍徒不自斂戢仍肆鴟張指稱仗用常例尖嘴過關飯食諸名色索詐分文並無本部給發腰牌混擾商船者許即喊稟輕則立斃杖下重則通詳

四院照依光棍律論決不稍假爾商民亦不得以不肖自處漏報偷關一經察出定行重究三尺具在毋視泛文各宜凜遵

曉諭寬商

圖 蘭

為曉諭寬商以足民食事照得本部自莅任以來無刻不以

國計民生為念稔知今歲淮郡苦被水滄惟藉外來米穀以足民間食用查進口過關錢糧則例輕重不一若不從寬減免誠恐商販晨星以致民間鮮食本部雖錢糧有虧斷不忍以一己之功名令百

姓嗷嗷也為此示仰商民船戶人等知悉嗣後凡
係進口飯米在於清江裡河卸賣及過關赴運淮
城一鋪卸賣者從前報納五分今一概寬減每石
止納三分爾商宜速運賣以足民食其有過西關
南下仍照則例投納毋得捏報欺隱有負本部寬
恤之至意

曉諭招徠

哈代

為曉諭招徠事照得鴨嘴梭划等船空重過關例
輸三關錢糧查近年以來過淮寥寥皆因歷任未
經寬恤致令商船裹足今本部奉

命權准志甦商困所有鴨嘴梭划船隻舊例應輸三關
錢糧者今槩從寬恤其船准報剥單貨物照石隨
到隨放並無阻滯爾等各宜及時攬運來淮上輸
國課下遂經營毋得觀望不前自失生計有負本部
恤商之至意

寬減米價

鄂喜

為寬減米價以恤商民事照得淮郡三城內外烟
火數十萬家全賴外來之米以資民生今秋陰雨
連綿米價寢長而過關米船寥寥無幾細查從前
雖經減恤而南北客商未獲週知本府莅任以來

念切民瘼正在出示招徠今據牙行謝開泰等公呈前來合再給示前往產米各地遍諭各商嗣後在於淮城一鋪卸賣食米仍照減則徵收每石向納五分者止納鈔銀三分該商等務須踴躍前來至客商既沾減稅之益於糶賣時亦須速為平減使閭閻共沾惠澤倘崇利自封亦非本府寬恤之婆心也

查辦米船

伊拉齊

為詳請免收等事乾隆六年十一月初一日准江蘇撫部院咨開據蘇州布政司詳稱竊照地方

歉收有藉商米接濟於乾隆三年欽奉

上諭

免收米稅如情形孔急奏請需時者一面奏明一

面俾其輸稅永著為令欽遵在案今淮徐海三府州屬並江揚鎮江府屬夏秋兩次被災米價騰貴應請咨明各院暨各關監督所有接濟災邑米船由地方官給與印票到關放行等情到院據此查商賈災邑發賣經由關隘固得免稅放行即回船載有他物亦有止徵貨稅免納船料之例除經一併聲明具

奏一面飭遵外相應咨會煩請查照一體辦理等因

到關准此合行出示曉諭為此示仰米販客商船戶人等知悉嗣後爾等運往歛收地方米船隨時給照免稅放行所給之照聽其隨便回空繳銷地方官不必鈐蓋印信若此縣販運者多米糧充足不妨轉售隣邑爾商獲貿易之利無守候之累務須踴躍爭先仰體

皇仁慎毋觀望

豆稅復徵

倭赫

為再行明白曉諭事照得米豆等稅接准部文欽奉

諭旨照舊徵收於初八日出示開徵停收船料在案爾商船隻一經抵關即將應納鈔銀預為齊備然後赴樓請查親身挨次投納倘有不法丁役扞量貨物暗勒使費以少作多或錢糧房重戩稱收或各書算需索填票銷號核算等項錢文均許爾等即在大樓委員處稟究或在縣喊稟以憑立拿追給盡法重處至鈔戶居停並非官設久經禁革倘此種不法之徒復萌故智仍然包攬嚇詐爾等立即喊稟以憑發縣究治若爾等貪圖小利勾串鈔戶賄通丁役減漏錢糧本府當關查驗得寔定即一

同發縣治罪爾等背井離鄉經營生理切勿無知
自罹法網今開徵之始再行曉諭悉宜凜遵毋違
船單扣限
伊拉齊

為曉諭事照得淮安關船單向例十二個月期滿
另行報換惟新任視事不論納單日期俱各飭換
新單蓋因從前係各清各任今既扣足一年報銷
所有前項未滿船單應俟扣足十二月限滿再行
報換合亟出示曉諭為此示仰船戶人等知悉如
有從前報單未滿十二個月者概行執驗過關俟
扣足原限再行繳換報納如有不法人役藉端指

勒需索許該船戶即行稟明以憑立拿重究該船
戶亦不得執滿限之單希冀僥倖致干未便

再行飭禁擬寔開報

富貴

為再行飭禁事照得本關部恭奉

恩命督理淮權業經一載自蒞任以來惟仰體

皇仁加惠商民之意除應徵正稅貨物悉照

題定則例收納外至於稽查客貨不許胥役人等需
索分毫以及刁蹬留難滋事久經遍示曉諭在案
但恐日久玩生或有愍不畏法之徒陽奉陰違亦
未可定合再出示飭禁為此示仰商販巡役人等

知悉嗣後貨船到口照例報納正稅於加一火耗之外不許多收分文其經過稽查口岸驗明貨船務須隨到隨放不得片刻留停倘有不法守口人役借端需索刁蹬留難滋累客販許該商民赴轅喊稟以憑立拿重處斷不寬貸至該商應完貨稅亦必據寔開報不得聽信船戶脚夫營私巧避希圖減報察出定行按律究懲本關部法在必行各宜凜遵

酌定分數限期轉運貨稅

方體浴

為再行申明轉運之條以杜影射以重稅課事照

得清江淮城湖嘴板閘等處卸賣貨物向經定有轉運之例總以按照商單量其貨物之多寡定限日之遠近貨數止許轉運三分之一限期至遠亦不過百日為止許其執單赴口驗明蓋印至大關驗明准其轉運所以體恤商販酌其成本於於全優恤之中仍寓防奸剔弊之意詎今日久玩生各該商販竟有不論何項貨物不問數之多寡限之遠近肆行轉運藉納商單轉為影射之據各關口人役既不遵照向例奉行客販得以賄囑更生繞越偷漏之弊查清江轉運各貨如到淮城必由清

江口查驗發票撲截淮城轉運清江必由下一鋪湖嘴轉運清江必由上一鋪發票撲截至大關查驗但其轉運之數統以三分之一為準如已逾三分之一一定數及已滿日期並不應轉運之貨概不准其轉運除諭飭各該口遵照查辦外合再出示申明曉諭為此示仰商販人等知悉嗣後凡有轉運貨物悉照後開酌定石數日期總以三分之一發票赴口查驗蓋印准其轉運倘有已逾三分之一一定數外仍行發票並敢有違定限及將不准轉運之貨勾通關口各書役肆行搬運希冀偷漏影

射一經查出除將貨物入官外仍一併從重究治斷不寬貸各宜凜遵

裁禁跟役

國棟

為曉諭事照得各關口家人僱人使用勢所難免然每人止須僱覓朴誠老寔者一二人即可敷用何得濫僱多人致滋糜費甚且別生事端今訪得淮關口向有一種跟役皆係遊手好閑之徒百計鑽營輾轉汲引該家人等一時碍於顏面遂為收用甚至有一人而收用十餘人者若輩到關無所事事不惟徒耗口食抑且從中作弊朋比肥殊

干法紀合亟示禁為此示諭該家人等嗣後使用
之人不得過兩名如有前項無籍跟役立即遵諭
遣去倘敢不遵示禁仍然濫用多人一經查出即
將該家人一併驅逐決不寬貸

嚴禁包攬虧課累商

伊齡阿

爲嚴禁曉諭以肅權政事照得商販挾貨貿易原
圖稍覓蠅頭輸課過關利在遄行無滯該商販於
產地置貨自有確數理應據寔開報以憑杆查輸
稅其應完錢糧亦須照例核數易銀交兌毋庸倩
託代報致滋包攬侵扣之弊本關部蒞任以來深

悉各口類有不法棍徒盤踞兜收哄誘商販串同
下役減報侵漁病商虧課莫此為甚除密行查拏
嚴究外合行出示嚴禁為此示仰南北商販并丁
役人等知悉嗣後凡有貨船抵關務須按照貨載
據寔開報以憑照則科算輸納毋得絲毫欺隱該
關役亦須隨到隨查秉公杆量毋許擾累至該口
地棍人等各宜洗心斂跡倘敢仍蹈前轍包攬虧
課貽害商民一經察出定即嚴拿究治決不輕貸
各宜凜遵

曉諭轉河貨物應報錢糧

淮陽縣志
為曉諭事照得南北客販置買貨物在於淮城湖
嘴等處起卸銷售既經完納大關錢糧併商稅之
後該舖戶若將此項貨物轉售他處卸賣除由旱
道發往淮城本鎮鄉村分銷者例不重徵外如係
裝往鹽城阜寧下河等處去者則有流均軋東等
口稽查裝往安東等處去者則有草灣永豐等口
稽查裝往王營等處去者則有外河等口稽查貨
已出境例應報納轉河錢糧始准給票放行票內
明白開註淮城河下認買字樣至上一舖係稽查
口岸向不徵收錢糧凡有出境貨物例應由該口

查明給帖具報大關完納轉河錢糧以便各該口
驗票放行此歷來辦理成規久經遵行無異者也
茲於本月初六日有佃湖李客買吳義生店桐油
蘇錢恒足店香油曹隆興店表心火紙等物又十
八日有佃湖崔客買協成店香油三小筭本地油
燭八籬又二十三日有安東谷客買朱永泰店表
心火紙三十餘塊俱係報往安東去並經上一舖
給帖令赴大關報納錢糧原係遵照成例辦理乃
該販等遽以一貨兩經報稅為辭希冀免報退有
後言此殆未明淮地貨物出境例應報納轉河錢

糧之故而各該舖戶等貿易有年豈尚昧昧不知
合再明白出示曉諭為此示諭上下一舖各舖戶
役人等知悉嗣後凡有北來貨物在各該舖轉運
南去與南來貨物由各該舖轉發下河安東王營
等處去者俱係轉賣出境之貨務各遵照成規報
納轉河錢糧毋得妄生浮議希圖隱漏致干咎戾
不貸

加嚴繳票功過

為再行嚴定規條以杜積弊事照得大關宿關及
各口徵收錢糧給發單票必須按班清繳以憑核

對稽查歷經各前任分別難易核計分數酌定賞
罰通飭遵照在案乃繳票巡役仍多怠玩不力一
任奸販匿票不繳以致未經納稅之貨竟有將舊
票抵塞希圖影射偷漏者現在查獲究懲此風斷
不可長而除弊必清其源惟在加嚴繳票之法查
從前原定成規既未免失之過寬且於大關之票
未經分定功過而宿票亦未據各口併繳一體核
議實屬踈漏合再另行酌定規條刊刻頒示自本
年九月十二日第一班起該繳票巡役等務須遵
照後開規條實力奉行毋得仍前懈忽從事致干

重咎

計開

易繳口岸

草灣 永豐 外河 清江

天妃 本關 烏沙河 白洋

軋東 周閘 廟灣 宿關

各口票內以銀數為分數如應繳之票銀
數十兩者即以十兩為十分餘做此

繳至九分五厘者免議

十分者記功一次

九分者記過一次

八分者記過二次

七分者停差一次

六分者停差二次

五分者革役

難繳口岸

下一舖 上一舖 仲庄 新河

後湖 流均

八分五厘者免議

九分者記功一次

九分五厘者記功二次

十分者賞差一次

八分者記過一次

七分者記過二次

六分者停差一次

五分者停差二次

四分者草役

軍餉一口為貨船南去總匯應繳各口票甚多繳至九分五厘者免議

九分五厘以外者記功一次

十分者記功二次

九分者記過一次

八分者記過二次

七分者停差一次

六分者停差二次

五分者草役

長山一口為北去總匯應繳之票亦多向

與軍餉同例第查該口有從黃河北上

之船每遇順風揚帆經過不能停泊巡

役無從收票亦屬實情今特量加酌減

繳至九分者免議

九分五厘者記功一次

十分者記功二次

八分五厘者記過一次

七分五厘者記過二次

六分五厘者停差一次

五分五厘者停差二次

四分五厘者革役

一本口卸賣貨票繳至十分者免議

九分五厘者記過二次

九分者停差一次
八分者革役

一大關大票照票繳至九分五厘者免議

九分五厘以外者記功一次

十分者記功二次

九分者記過一次

八分者記過二次

七分者停差一次

六分者停差二次

五分者革役

以上各口如有應繳宿票並同此例一體查議

一各口票內銀數在一二兩以內者應得賞罰
臨時酌定

一大關之票張數在一二十張以內者應得賞罰亦臨時酌定

淮關統志卷之十一終

淮關統志卷之十二

古蹟 寺觀祠墓附

搜竒攬勝固達人所不廢而尠識寡聞亦吾儕所深恥淮徐素多名蹟司權者日守一隅稽察稅務何暇遍歷周知而悉數之今第就見聞所及擇其有可考據者撮舉一二附於關志之末亦聊以免固陋之誚云爾志古蹟

淮陰故城

山陽縣治西北五十里水經注云淮水東北經淮陰故城韓信嘗釣於此按秦置九江郡淮陰縣隸

焉城宜在彼時所築晉永和間祖逖劉隗郝鑿荀
羨輩皆握重兵屯此始廢為淮陰鎮今考其地在
河口天妃閘東南

山陽故城

在今縣治南晉安帝義熙間即射陽縣之地置山
陽縣則築城宜在此時考從前建置先淮陰次射
陽又次山陽淮陰城在今縣治西射陽城在今縣
治東而故城寔在今縣治之南

射陂

前漢書志廣陵王胥子南利侯寶有罪其相勝之

奏奪王射陂草田以賦貧民張晏注曰射水之陂
在射陽縣又寶應縣志云白水塘在縣治西八十
五里舊名白水陂一曰射陂按山陽寶應皆古射
陽地白水塘即今高堰以東山寶二縣運河西岸
地明一統志以射陽湖為射陂非是射水在南湖
與縣皆在其北故曰射陽

甘羅城

山陽舊志云在淮陰縣治北今屬清河界去河口
馬頭司里許相傳為秦甘羅築雨後常於土中得
小錢其篆文不可識或云寶應有甘羅廟此或其

葬處也按史記甘羅為甘茂之孫下蔡人始皇初
年為卿始皇二十六年始并天下置郡縣當甘羅
用事時淮陰尚屬楚地何緣築城宋徐仲車登淮
陰古城詩序云以傳考之所謂甘羅城者非也謂
之淮陰故城可也其言必有所據以舊說相沿故
仍存之

韓信城

山陽舊志云與淮陰故城相近寰宇記曰信封侯
時築按信由楚王降封淮陰侯稱病未就國何由
築城况漢去今數千年河淮遷徙遺址盡湮又何

從寔指其所耶

韓侯釣臺

舊關志載在滿浦坊漢時建今有石碑一座按山
陽志辨譌云史記淮陰侯傳載信嘗釣於城下城
下乃古淮陰城也去今淮城五十餘里縣廢城圯
信所遊歷處如淮陰市胯下橋及韓母漂母諸塚
盡湮於水久無遺跡可考今淮城北門外漕河堤
壩有韓侯釣臺乃明萬歷中淮守劉大文追建是
以唐宋元人皆無咏釣臺詩至明潘中丞集中始
見可知創造未久焉得漫指為漢時建耶

勝下橋

去淮陰故城半里許即韓信未遇時為少年所辱處今久湮廢不可考

南昌亭

在淮陰故縣即韓信微時從亭長寄食處元陳孚詩云泊舟公路浦始見南昌亭其時亭或尚存今無可考矣

千金亭

在淮陰故縣西韓信微時常釣於此漂母飯信信貴報以千金後人因築亭於其處

漂母岸

在淮陰故城南為母浣布之所唐崔國輔有詩

三亭

俱在淮陰故縣韓亭在故縣南枚亭在故縣北步亭在故縣西以韓信枚皋步隲得名宋晁端彥有詩云韓枚步隲建三亭為顯當時將相名是也

枚皋宅

在淮陰故縣按山陽縣志辨譌云城西北三里湖嘴俗稱枚皋故里史記載乘在梁娶皋母為小妻及乘東歸皋母不肯隨分皋數千錢留與母居年

十七事梁孝王及至長安武帝善之拜為郎是皋
雖乘子未常至淮陰即有故里亦屬乘不屬皋而
乘有故里亦當在古淮陰不在今山陽縣土人以
趙承祜有家在枚皋舊宅邊之句遂以名其里其
寔詩人寄興之詞原不必寔有所據也

鉢池山丹井

在關署西北五里許岡阜盤旋八九里形如鉢盂
周靈王太子晉字子喬煉丹於此故有丹臺丹井
相傳臺下舊有七井後祇存道旁一井及喬仙去
井水日變三色其味甘美異常今丹臺微有殘基
而丹井已渺不可考矣

袁浦

在淮陰故縣西二里鄴道元水經注云淮陰縣城
西二里有公路浦昔袁術自九江東奔袁譚路出
茲浦而得名非清江浦也

杜康橋

在山陽縣治東北古淮岸有劉伶臺橋與臺近不
知始於何時

劉伶臺

山陽縣辨譌云郡東十里有劉伶臺在古淮堤上

前祠後墓祠祀劉伶以杜康配隄南數里有杜康橋按晉書伶沛國人墓不當在山陽意其逃名醉鄉踪跡或在河內山陽此地遂因而附會之耳至伶與康時地迥異配食一堂殆以酒作之合歟唐許渾有劉伶臺下稻花晚之句則其由來已久光州志載劉伶臺天下凡十有三處浙江嘉興志亦有之

洪澤館

洪澤未匯為湖時有洪澤鎮自淮陰達濠泗官路也上有洪澤館為過客停驂之所又有洪澤村洪

澤橋市屢櫛比商旅輻輳唐皇甫冉有洪澤館詩

趙嘏竹軒

嘏憶山陽詩云家在枚皋舊宅邊竹軒晴與楚坡連今無可考然詩中有芰荷楊柳烟島夕陽當在湖邨河渚間也

轉搬倉

在運河西岸唐時漕運凡江淮運米暫儲此倉轉運關陝北有運河堰周世宗始置滿浦關以通水路

山陽灣

昔淮水東流過清口經甘羅城達清江浦至相家灣趨柳浦灣迤邐紆折即古山陽灣也一名山陽渡一名山陽津水最湍急宋淮南轉運使喬維嶽別開運道以避山陽灣之險自黃河北徙其險遂平今柳浦等處陸地皆昔之巨浸也

西湖故蹟

即管家湖在山陽舊城望雲門外舊隔仁濟橋為南北二湖宋嘉定時安撫使應純之嘗於此建水教亭教習舟師由城西水門小舟可入自運道改而湖與城隔矣然烟艇漁榔可騁遊目者尚在淮

郡舊志云逮永濟河開兩湖積水難洩多浸民田天啟年間山陽令孫肇興開洞口以洩之西湖遂涸為田今運河西岸自西門以北歷湖嘴至板閘皆西湖故迹也

白果塔

淮城東南涇河蔡家橋一帶地多墩阜相傳未有塔時大霧三日霧開塢見本細末大形如白果土人以為仙跡

屯船塢

即山陽縣城內地古無縣城如馬路池陸家池等

處皆糧艘屯集處既築城乃懸空二水門以便船
桅出入故號其門曰天衢今桃花營皆昔日歌樓
舞館

躍龍池

在清江浦常盈倉前以明武宗捕魚濡水故得是
名

招隱亭

在西湖嘴運河西岸明隆慶間沔陽陳文燭為淮
郡守時有五岳山人郭次甫隱焦山公延之建庵
築亭為次甫觴咏地亭前烟波浩渺楊柳芙蓉為

一時勝境後漸就頽敗 國朝順治年間山陽張
銓部新標復加修葺與同郡胡從中程涑諸人賦
詩紀勝今又圯廢矣

愛蓮亭

在關署後山子湖心四圍皆蓮亭居其中康熙五
十三年前監督党古禮建內供大士像相傳有僧
自雲臺負來者碧水紅闌宜晴宜雨不獨夏日可
恣遊賞也向為淮關香火院有湖田二十畝零乾
隆甲午河溢老壩湖盡淤平亭臺俱沒余於丙申
年改建為觀音菴有記

沙岡

鹽城縣治西北鹽邑境內無山惟沙岡一帶南抵岡門鎮北距海延接阜寧遞起遞伏五六十里石人頭

出土高四尺五寸在鹽城縣北六十里離海岸止里許

廟灣城

詳見鄉鎮卷內

雲梯關

阜寧縣北有數大套疊若雲梯河湖諸流皆從此

出海昔為重鎮築墩十座衛指揮領兵防守旁多屯地

清河故城

在大清河口宋咸淳九年淮東制置司李庭芝築元泰定初因河決遷治於河南岸甘羅故城至元十五年因兵亂復築土城仍移河北即今之所謂舊縣也明末再遷於甘羅城不久復歸故治今於乾隆二十六年遷於清江閘南岸一里許而黃河北岸陶家庄西之舊縣土城漸就傾廢矣

泰山墩

去河口馬頭鎮二里許土人因墩下有東嶽祠故名為泰山墩從陂澤中突兀一邱遠望之如浮翠馬淮郡以此山為盱泗來龍至此局鎖兩河之口為郡城龍脉所關

老子山

淮郡東南一百里屬清河縣世傳老子煉丹於此山西有仙人洞深二丈許下臨淮水四壁如削

漣水三城

安東縣治有大城東城二所相連只隔一濠又有西城稍遠百餘步各有城濠俱宋嘉熙四年知州

蕭均所築按宋史載李璿以漣水三城來歸即此金城故縣

安東縣治北唐時置按唐書地理志泗州臨淮郡下註云武德四年始以漣水縣置漣州并置金城縣貞觀元年州廢省金城縣此當是武德四年所置也九域志云漣水縣有金城镇即故縣

桃源故城

即今桃源縣治按金史云泗州有淮濱縣宣宗興定二年以宿遷之桃園鎮置城旋於元光二年廢為鎮元至元十四年復置曰桃園縣後乃訛曰桃

源

桃源古洞

縣治東三義廟內陰雨連綿庭深積潦宋建炎三年浮出一石碣其文曰無為大道天知人情無為窈冥神見人形心言意語鬼聞人聲犯禁滿盈地收人魂三十六字

古城

有二按舊志云一在桃源縣治西北六十里相傳晉石崇出鎮下邳時所築一在宿遷縣治運河西三里相傳為項羽所築

伍員里

在宿遷縣北七十里桃溝崖

項羽里

在宿遷縣治北一里梧桐巷

寺觀

附淮運河堤壩之顯見者餘不概載

景慧禪寺

關署西北六里許鉢池山之陽背淮面湖境最清曠相傳建自宋季至明正統戊午年重建 國朝乾隆癸未年 先大夫司權時復經捐貲脩整甲午河溢被淤

百子堂

板閘鎮西運河北岸明萬曆癸巳年權使李秩建
國朝乾隆四年前監督三保重建

龍王廟

百子堂東乾隆二十六年前監督普福重建

元天宮

板閘鎮後西街明隆慶庚午年權使殷登瀛重建
國朝康熙二十七年
前監督柰馬代捐俸脩葺
供奉

龍亭每逢令節朔望及一切

朝賀之期詣宮行禮定爲章程至今無異

城隍廟

板閘鎮後西街元天宮之左乾隆十六年前監督
普福建

觀音寺

板閘鎮南街明洪熙元年勅建

大王廟

在大關樓後明萬曆己未年段起麟建
舊關志載王姓謝諱緒宋會稽學生員居錢塘之安溪晉
太傅安石公之裔也素有壯志會宋鼎將移不果

仕隱於金龍山巔建白雲亭以詩自娛甲戌秋月
大雨天目山崩居民旁皇王會眾泣曰天目為臨
安之主山今崩宋其危乎未幾宋鼎移王日夜涕
泣誓死以報一日忽賦詩一律與其徒永訣且曰
異日黃水逆流是予報讐日也遂赴水死人咸異
之即舉屍葬於金龍山麓後明太祖與元將蠻子
海牙戰于呂梁明兵大潰太祖忽見空中有二將
身披甲手執鞭擁黃河北流元眾大敗是夜太祖
夢一儒生入告曰吾宋時會稽學生員謝緒是也
行四會宋滅盡節赴茗溪死葬於金龍山抱恨九

泉今持為擁河北流相助以伸平生志其兩人則
幽冥結義兄弟楠木二神太祖驚醒即封為金龍
四大王主管黃河至今顯赫沿河廟祀不一天妃
開最為靈異各處皆有碑記

三元宮

板閘鎮南街明萬歷己未年權使莊起元建後正
殿火燬乾隆十七年前監督普福捐貲復建 又
河北西里亦有三官殿

清淨菴

板閘鎮南街順治九年建 又河北西里亦有清
淨菴乾隆十四年僧人嵩曉募建

回施菴

板閘鎮運河北岸雍正十年前監督年希堯建併
置香火田三頃零

觀音菴

板閘鎮運河南岸大關樓對過康熙甲午年前監督党古禮建乾隆甲午年住持僧募化重脩並增關帝大殿置有香火田一頃四畝零坐落戴家灣河西地方每年包租米六十八石印契交明住持心智收領該僧領結並錄底契印發東房備案福緣菴

板閘鎮運河南岸康熙十六年前監督鄂愷建乾隆癸未年先大夫捐貲脩葺新建觀音菴

即愛蓮亭舊址向有院田二十畝為淮關香火乾隆甲午春契買民人劉湘芝田八十畝後黃河老壩漫口湖亭淤成平地而觀音像存焉余狗僧人佛悟之請因捐資重建此菴有記里人即於正殿後築室三楹為先大夫祠歲貢生金坦為之記今戊戌年二月契買民人陳永昌田七十七畝零通計田一頃七十七畝零界在本菴四面毗連印契俱交住持收領並將該僧領結及照錄契紙印發東房備案

火星廟

板閘鎮東街明正德年徐雲洞建

關帝廟

在火星廟左

文昌閣

舊在魁星樓外乾隆己巳年移於關帝廟左樓閣
魏我一時稱盛二十七年與關帝廟火星廟同被
火燬今俱復建

魁星樓

東街路口行人出入俱由樓下往來不知建於何
年明崇禎丁丑年修國朝乾隆丙寅年重建朝
西額曰大魁天下朝東額曰願出於塗

如意菴

出魁星樓東南數十步本係草庵乾隆元年改為
瓦苫十七年經風雨塌卸僧人實德募脩前監督
高恒復建

篆香樓

在關署東北二里許明嘉靖辛亥年淮水夾岸大
病挽輸督府患之命有司禱於淮神因作巨樓鎮
壓其地而大川以寧戶部廣西司主事江陰沈奎
有建篆香樓後堂叙國朝乾隆年間每歲四月
十八日凡板閘淮北各坊鎮有香會者俱集於此
稱為一時之盛

通源寺

在關署東新路北即古大悲菴創始於宋至前明
吏科都諫胡應嘉延僧圓慧鼎建萬曆五年淮安
知府邵元哲改名通源寺慧二世孫如安重脩刑
部周三錫建妙法堂立十方常住知府宋祖舜大
叅高登龍置田供佛齋僧有記
乾隆甲午
河溢被衝祠傾像壞四十二年住持僧悅賢募化
重脩余亦捐貲相助殿宇增新

關帝廟

本通源寺東廡有帝像一尊乾隆三十三年里

人許成琪王恕等倡議合鎮捐貲并僧悅賢募建
正殿別山門於寺左里人張迨為之記

西來菴

在新路南通源寺東數十武不知建於何年疑即
通源下院菴後有普同塔即通源寺住持僧果達
所建新安孫綏有碑銘今字跡多剝蝕不可考以
時計之與作通源寺十方常覽記不遠故知西來
樓殿亦通源屬也今菴寺久分為二河溢後各就
頽敗乾隆丙申年住持僧靜持募化重脩余亦捐
貲助之

吉祥律院

舊名上真觀在通湖庄明萬歷年建前僧侶贖主
席力為振興并於本菴東北隅置設孤臺每日放
醵口一臺超度孤魂六年之久風雨不輟

東嶽廟

在窰溝頭吉祥院東明嘉靖年建 國朝乾隆癸
未 先大夫捐貲助建後樓

普應菴

在烏沙河東岸明嘉靖年建天啟四年重脩置院
田六十畝現有壁記 國朝乾隆癸未年 先大

夫增脩殿宇六間廚房三間

祖堂寺

在烏沙河普應菴東創建於唐 國朝康熙年間
重脩

聞思寺

在西湖嘴宋僧人蘭孟創建名大悲菴清規法律
甚屬森嚴 國朝康熙四十四年

聖祖南巡

勅改今額

佑濟禪寺

即湖心寺亦曰十方禪院在湖嘴西岸背堤面湖
明萬曆十八年建二十九年工部尚書劉于重脩
崇禎十一年總漕朱大典 國朝順治十三年總
漕蔡士英俱增修康熙四十四年

聖祖南巡

勅改今額

淨土菴

在湖嘴西岸明崇禎九年杭州府推官黃端伯建
青蓮菴

在湖嘴對岸水中央長堤環繞萬柳掩映稱為勝

地明禮部尚書董其昌嘗往來觴咏於此書贈匾
額 又河北西里青蓮菴在宋家棚坊

泰山殿

在小舟左南運河東岸乾隆丁酉年住持僧募捐
重建

大關帝廟

在淮城西門漂母祠北

普濟堂

在淮城西門外運河東岸乾隆八年休寧候選知
縣程鍾捐建

羅漢堂

在南鎖壩運河西岸明崇禎六年建

湛真寺

在河北東里于家壩之南舊名紹隆寺康熙二十五年僧益輪改建海寧俞兆晟有記康熙四十四年

聖祖南巡益輪率其首座燈岱同覲

天顏

勅賜今額並宸翰御書供奉寺內置有香火田畝

古火星廟

河北東里湛真寺後

文昌閣

河北西里乾隆四十一年淮北監掣同知張永貴倡修接任同知張輔繼成之本鎮生員丁玉衡有記

北極宮

河北西里宋崇寧四年道納丁如玉始建供奉水神明正德七年太原監生閻天錫捐修國朝康熙五十七年僧人惟和募化十方重修淨名寺

河北東里建於宋元豐年間殿宇楹廊頗稱整肅
正殿有巨鐘叩之聲達數里關署中嘗聞之 國
朝康熙四十八年淮守姚陶捐貲重修前有東輝
和尚騎牛托鉢而去後有子懷和尚開堂說法著
有語錄傳世今寺漸圯鐘亦駁蝕不可用住持僧
普立募化重修鐘亦重置自乾隆甲午河溢被衝
又復頽敗矣

白衣菴

河北西里康熙年間建乾隆四年僧人素可募修
海會寺

在清河縣界運河南岸明成化年建前監督普福
重修

三義閣

在清江閘下館驛之南即關帝廟

慈雲寺

在清江閘南岸明萬歷四十三年建 國朝雍正
十三年前監督年希堯奉

旨

動帑興修置香火田三十八頃五十八畝有零坐落
阜寧縣陳家浦現有關部印牌詳開四至給予住
持收執乾隆四年

頒賜龍藏全部供奉又二十六年僧人實宗呈領外河石馬頭新淤灘地二頃五十畝三分有零經清河縣令姚某詳請陞科每頃輸租銀五錢給照執據又前明故僧性安募買三鋪田一頃二十餘畝自僧月照改住海神廟即將此田帶去後經淮守姜順蛟斷將此田各分一半山陽知縣屠尚元為之立碑慈雲寺分田係東一分計六十三畝

覺津寺

舊名檀度寺在清江浦河北岸明鄉人楊漢捨宅沙門祖亨創建後人因係古刹衆姓相繼募化官

民交助增拓蔽林淮海道宋統殷有記康熙四十四年

聖祖南巡

勅賜今額

棲蘆菴

舊名折蘆菴在清江浦運河南岸康熙四十四年

聖祖南巡改名棲蘆

誕登寺

去關署西北十五里鋒池山後舊名洪福寺宋淳祐年建

聖祖南巡

勅改今額雍正十一年命住持僧萬清重修

弘濟祠

清江浦工部前明弘治年間建

倉神祠

清江浦戶部倉北明天啟年間建

靈應祠

清江浦戶部前明嘉靖年間建

海神廟

清江浦運河北岸今改名留雲院

玄帝山

清江浦運河南岸明正統己丑年建

禹王廟

本在高堰湖堤乾隆三十二年兩江總督大學士

高晉總河李弘移建於玄帝山右

惠濟祠

即河口奶奶廟乾隆十六年奉

旨着兩淮鹽院吉慶動用商捐銀兩交前監督普福并

委淮揚道吳嗣爵協同監修二十一年

聖駕南巡又

諭令前監督高恒重修疊賜
御書詩文聯匾勒石建亭金輝碧映高峙雄觀每逢
上閱河工進香禮拜靈慈有感永慶安瀾

祠墓附

德公祠

康熙十八年里人為前權使德明建今在關樓後
大王廟內

圖公書院

板閘鎮大關樓南運河東岸康熙四十四年里人
為前監督圖蘭建嗣於乾隆癸酉年重修今又傾

圮矣

翁公祠

在板閘鎮堡房之右康熙十五年里人為前監督
翁英建日久傾圮乾隆三十八年公孫嘉謨任漕
運總督據地藏菴住持僧人稟請重脩特捐資命
役鳩工整飭如舊並置有香火田畝

烈女祠

在通源寺右明正德五年淮安府推官馬騃為泗
州何烈女建事詳烈女祠碑記 國朝乾隆甲午
河溢祠傾物隨波散而女像則或浮或沉不離墓

所余因僧人悅賢與通源寺併募重脩捐貲為助
漂母祠

舊在淮城西門內明都御史王暉記成化初遷西
門外即今建驛館地淮安知府陳文燭記後移韓
侯釣臺側 國朝康熙二十三年山陽知縣王命
選捐修雍正十一年淮安知府朱奎揚復修乾隆
五年知府李暉委訓導汪克紹紳士童維祺重修
改造船舫修葺亭臺并封樹陳節婦墓墓在祠側遂為
山陽勝境

鮑烈女祠

在南鎖壩下一舖口北旌表明故貞女鮑氏舊迹
久湮 國朝康熙年間庠生許常憲請於山陽令
徐恕清查基址依墓建祠乾隆元年新安程鍾捐
貲重修有記

雙烈祠

河北西里與淮城府署東首祠同為烈女何氏烈
婦徐氏建

陳公祠

清江浦運河南岸明正統六年為平江伯陳恭襄
公瑄建祭酒吳節為之記

韓母墓

舊志云在淮陰縣西四十里清河縣志云在韓信城下半里許與漂母墓相對俗呼為東西塚今不可考

漂母墓

舊志云在淮陰縣北按張華註淮陰侯傳曰漂母塚在泗口南唐崔國輔漂母岸詩云泗水入淮處南邊古岸存又云茫茫水中渚上有一孤墩與張華泗口南岸之說相符清河志云漂母塚即今泰山墩蓋因墩近韓城而臆斷之也其說未可為據

枚臯墓

舊志云在淮陰故縣今失其處按臯初居梁後入長安上書武帝拜為中郎將持節使單于不知何時又復歸老淮陰舊志相仍姑存之

葉淇墓

明太子太保戶部尚書墓在移風閘西岸有神道碑祠宇

楊理墓

明刑部侍郎墓在鉢池山之陽

孔椿墓

在烏沙河見其妻謝氏節烈及其子金孝行各傳
內

何烈女墓

關署東新路北明淮安府推官馬騃依墓建祠塑
像有記三十九年河溢祠傾窰溝板閘新街一帶
湖岸淤平獨女墓周圍似有漩窩捧墓而出今墓
與祠俱修葺一新

陳節婦墓

在漂母祠內墓前有井碑碣見存傳即節婦死處
鮑烈女墓

郡城南門外運河東岸今建坊立祠衡陽丁元正
有記

淮關統志卷之十二終

淮關志卷之十三

人物列女附

記云八里必式解之者曰所謂不誣十室也關誌
 為權政而設原不必紀及人物然而地靈人傑何
 處無才表章潛德遺美可惜板閘雖蕞爾鄉隅司
 權者多及瓜而代固不能廣稽博採搜羅罔覈而
 目見耳聞凡屬關之隣近左右寔有政事文章忠
 孝節義卓卓可傳者不得不略舉一二以誌景仰
 之誠且於邑乘亦不無小補云志人物

明

丁 珏山陽人居淮北鎮授徒鄉塾有范希文先
憂後樂之志文廟渡淮獻十二策宣廟時以人
材徵授監察御史奉命抄廣右豪族珏潛往廉
其寔一舉撲滅之奸臣紀綱竊權亂政珏率諸
御史廷劾之紀綱伏誅改給事中後以直言不
屈謫戍雲南

楊 旻字克彰板閘人性至孝父早世哀毀骨立
母慰解之即收淚和顏以悅母而哀不替母病
晝夜未嘗安寢母歿哀號頓仆水漿不入口者
數日及葬廬於墓側晨夕奉盥濯如生時哀痛

之聲聞者感動有司以其事上聞旌其門後以
子理貴累封工部侍郎祀鄉賢

葉 淇字本清板閘鎮人明景泰甲戌進士拜監
察御史成化初用薦超陞廣西按察司僉事撫
定南丹土職督捕南寧荔浦諸賊遷陝西副使
領岷州兵備又撫定松潘勦平洮州各賊擢河
南按察使拜都察院左僉都御史巡撫山西值
歲歉民饑發廩賑粟全活甚衆弘治初召為戶
部侍郎進尚書加太子少保直亮有執廷議每
取決焉後以疾乞歸卒贈太子太保葬移風閘

葉贄字從禮淇從子天順甲申進士歷刑部主事員外郎知嘉興府再知台州當官內和外嚴人不敢干以私成化中歲饑屬邑多盜官兵莫敢櫻贄親往撫諭賑貸有差賊遂散丁內艱去職服闕後再知廣信累陞江西布政司平瑞州盜鄧達八等有功陞都察院右副都御史總督南京糧儲進工刑二部侍郎致仕卒祀鄉賢

楊理字貫之孝子旻之子明成化丙戌進士歷官刑科都給事中叅駁詳允凡所舉奏不務急刻克宣寧王府冊封副使不受餽賚同考禮部

時稱得人尋遷大理寺左丞詳讞平恕一無寃濫進都察院右副都御史巡撫河南歲饑河大決汴城幾墊乃增築汴堤水不為害湖廣饑民流入盧氏永寧將構亂躬往撫諭發銀穀賑之有司請俟奏報曰事在不測俟奏報民死且盡去為盜如以為罪某當之比勅至悉如所議全活不可勝紀陞工部右侍郎年六十卒遣官諭祭葬墓在鉢池山之側

劉麒字文禎板閘人積學工文有聲黌序終歲閉戶孜孜不倦晚築高卧軒吟誦其間蒐探古

今以資著述故詩文重一時性尤慈惠凡有裨
桑梓之務知無不爲嘗於家園後置義地一區
鄉之貧無葬所者多沾其德焉弟麟字文祥亦
郡庠生能文好義略與兄同

葉 恩字永錫淇再從孫嘉靖庚戌進士授榆次
知縣調歸安不畏強禦浙民號曰鐵面擢河南
道御史時國戚宦官恃寵驕恣有茅某以不法
聞章七上必論如律然後已宦官隱蔽羣盜撫
按不敢言抗章論奏根株殆盡又劾浙督李天
寵失悞軍機詔逮問直聲振一時為忌者所中

以巡江差致仕歸子允武字健菴邑廩生時有
文入武闈之例中萬歷癸巳武會元未仕

孔 金父椿母謝氏椿苑遺腹生金幼有孝行母
被大賈杜言逼娶投河苑金屢訟不勝言以賄
謀斃金金乞食走闕下擊登聞具奏不得達復
走歸烏沙河於父椿墓所結廬哀哭晝夜不輟
聲里人劉清等上其事太守張守約異之召隣
里媒氏並置對吐實擬言斬未幾張卒言黃緣
得脫金復號訟不休被箠無完膚撫按理舊牘
仍坐言斬苑獄中金涕泣終身推官曹於汴署

郡事聘爲鄉飲賓歿祀鄉賢長子良克繼父志朝夕孝養母喪哀毀廬墓一如其父次子忠於母死葬畢掃棘上食涕泣祠像前及父歿行事悉循其父萬歷年間並以孝行旌表

丁 珍字君聘號時齋河北人弱冠遊郡庠才名日熾所學經史百氏靡弗究覽父早卒弟妹幼提攜婚嫁未嘗告瘁居平勇於爲義鄉先輩嘗歷指其事爲詩誦之

劉一焯字天燭號帶湖天啟年間庠生志行高卓見義勇爲板閘鎮後山子諸湖時多異漲屢爲

民患乃啟當事築三城壩以障之又開解阜洞以時宣洩之皆捐厚貲任勞勩卒底於成

沃士彥字蜚南明崇禎庚午貢生其先世以武功顯至士彥折節讀書遂成名儒凡經史子集天官地志醫卜種植之書無不讀尤邃於三禮凡典物儀制亶亶辨晰悉有指歸子起龍字荀伯副榜貢生起鳳字儀仲恩貢生所學皆深探淵微不趨時徑士林交稱之

萬壽祺字年少崇禎庚午舉人本籍徐州因避邳徐之亂流寓山陽初卜居於蔡市橋西山子湖

之濱晚年又結廬於清江之南村名隰西草堂
常被僧服自稱沙門慧壽而飲酒食肉如故也
工詩文善書畫百工技藝無不通曉一時遺民
故老過淮者莫不枉道草堂流連竟日卒殯南
村
胡從中字師虞明崇禎壬午舉人爲人內和外交
嘗避跡鄉里不以仕進為榮其詩磅礴縱橫有
真氣書法絕類蘇長公長箋短札遍滿人間人
皆寶而藏之晚年築舍鉢池山側繞屋種棟顏
其室曰棟居即以自號年八十餘卒

丁 璋 寧溝人任順天府通判精敏慈惠士民仰
戴舊傳淮大衛軍運漕抵通多以缺額獲罪縲
係部獄璋稔知轉輸艱苦代為陳情戶部奏准
甦豁衛人感激勒石樹坊以彰其德今尚有京
兆坊遺蹟

國朝

靳應昇字璧星號茶坡河北鎮人順治戊子歲貢
生博學工文尤長於詩與同里張虞山閻再彭
日夕倡和一時稱爲三詩人

朱文蔚字豹一板閘人由監生歷任山東膠州府

通判才猷敏達府事有不決者上憲輒委令剖
斷文蔚治理繁劇寔能佐本府所不逮

劉 宮字峻升穎敏過人於書無所不讀而擇言
尤雅於古人精義所在獨得指歸爲文別開生
面一洗濃溽之習詩尤深細和雅每一篇出騷
壇者宿莫不避席傾倒生三子皆遵奉庭訓以
文章顯長子廣字豫菴淹雅博洽譽重儒林早
歲補增廣生員屢試南宮未售乃閉戶著書暇
則伸紙揮毫臨摹右軍法帖故詩字為一時之
冠季子庶官至府同知

高維嶽字魯瞻板閘人敦尚節義望重鄉評歷仕
青州府通判著有賢聲以子夢龍貴馳封中憲
大夫

周 憲字度千號蓮漪板閘鎮人康熙壬午舉人
丙戌進士事親克孝家貧必潔甘旨以進苦志
下帷工制舉義鄉會墨出天下傳頌之授廣東
興寧縣知縣歲大旱精禋以禱天立雨開倉哺
饑者多所全活境故多盜廉得其魁捕置之法
境內肅清丁內艱歸卒於家

朱 申板閘人康熙甲子歲貢生文名素著屢蹟

南宮時人多惜之晚年閉戶授徒手不釋卷

程 塏字爽林弟嗣立字風衣其先世自歛遷淮相繼遊安東庠塏登乙酉賢書嗣立由廩膳貢成均皆好學工詩文嗣立尤精書畫今烏沙河伏龍洞側有菰蒲曲即其讀書別業所稱曲江樓處也

何煥如板閘人康熙辛卯舉人天姿穎異博洽淹通有問難者引據經史答之如數家珍公車屢上終未成進士惜哉

何 坦字履平板閘人康熙癸巳由本籍河南中

式舉人姿幹英偉志在四方獲售後不圖仕進遨遊汧渭之間所過必有題咏晚年歸里與同輩飲酒賦詩具有犖犖不羈之概

高夢龍字荀伯板閘人青州別駕維嶧長子初任西安布政司理問內遷戶部員外陞陝西鞏昌知府到任後裁冗役興大利除夙弊清查各州縣薪水皆自備時西藏用兵奉委押解軍餉數十萬旋委解兵丁羊皮手套數十騾又委解駱駝馬數百匹異域遐荒風沙撲面夢龍與胥牧共甘苦故出藏三次皆無錯悞遞奉大將軍保

奏軍功一等陞涼莊道又調臨洮西寧諸處兵
備道丁內艱服闋補陝西驛鹽道陞西寧按察
使卒於官弟履謙字遵六候選州同亦以能文
著

劉庶字允衆板閘鎮人食餼順天工詩字克桐
板館纂修古今圖書集成議叙授直隸商州維
南知縣清慎勤敏案無滯牘歷任八載題陞延
安同知緣缺改借補直隸邠州二載病歸後補
湖北施南府同知調黃州府同知歲餘卒於任
朱于宣字惠方號菘山板閘鎮人由教習授封邱

知縣捐俸貲修學校勸農課桑期年大治封邑
地值昂貴貧者棺骸至無厝所乃置漏澤園數
十畝於西門外掩骼無算民至今思之又前令
未結命案十餘件于宣虛懷廉察悉得其寔百
姓仰若神明嗣陞北河同知署開封府事

楊繼善字述齋板閘人由歲貢生任貴池縣訓導
文思敏銳一題必成文數首各出其竒在任時
課士有方做經義治事規條人慶得師焉

田興助字九一號耕者板閘人幼工詞翰有神童
之譽緣家貧親老乃棄儒謀升斗以資孝養親

歿竭力營葬家益困顛性好施予有以危亡告者雖厨不舉火亦解衣質物濟之里有公事必奮勉倡率如遷建文昌閣修理邵公橋陳公新路皆歷歷膾炙人口生四子孝思弟怡信惇禮恭督課甚嚴雖一夕不稍縱及弟怡成進士爲邑宰則歲取祿俸之半爲冬夏茶湯費施濟之事殆至老不衰云

丁 維字密州號鑑湖河北鎮人雍正壬子舉人乾隆己未進士授福建長汀縣時值山水暴發淹沒民田饑饉在望甫下車即請於府開兩倉

分日平糶賑濟後府倉失日饑民大譁復捐俸親詣安撫民攀輿膜拜呼父母於士林尤多保護有脫縲絏而致青雲者後坐沽名議去去之日士民泣送百里外望舟遙拜者不絕

丁 淮字桐巖號問渠一字蘊劬河北人至性深醇七齡失怙恃哀麻哭踊晝夜不輟聲每時祭伏泣不能起聞者哀之稍長就外傳歸侍兄布席煮茗相隨誦讀依依不去後兄析居宅於萊市橋間日必往省視兄歿諸姪勢日落復邁水患仍歸於淮淮屋廬湫隘乃掃室西數椽居之

於親族尤多惠澤鄉人高其行多感悟焉生平
邃於史漢數竒不遇僅貢太學子三人玉衡毓
璨毓琛皆邑諸生

田弟怡字仲吹號麓谷板閘鎮人乾隆庚午舉人
辛未進士幼穎慧父以家貧棄儒訓之特切弟
怡受命益自勵爲文出入古大家拗折道逸授
徒漣水每歲時歸省雖風雨不息也生平持身
狷介登第後足跡不至公庭遇有里中義舉則
必率先首創當事者欽其品望往往造廬殷請
以重事煩董率弟怡慨任不辭後知山東清平

縣事到任後平反大獄一時服其廉明清邑民
怠於學弟怡捐創義塾弦歌之化被於縣境並
著訓士語四則啟發周至在任八月正擬成治
清十要爲上憲陳之會聞訃感傷致疾出署寓
於義塾未兩月而卒

鄒士麟字仁圃河北人由宗人府供事任黃梅縣
縣丞吏治嫻習佐理從容而立身廉介尤爲上
憲所嘉許後署黃梅縣事旋以疾歸

楊澄源字秀涵板閘人以州同管理黃河南岸主
簿具個儻才承辦工程不辭勞瘁事竣據寔報

銷人稱廉介惜未得展其大用

楊基遠字立堂板閘人由吏員授宣化縣典史小心供職於囹圄中上遵國法下恤民情而操守謹飭尤微員中所不可多得者

張迨字南州板閘人讀書十行並下嗜古曠達不屑爲俗下文字善飲酒酣輒放筆爲詩洋洋洒洒數千言立就時或據案高歌自成格調歷遊南北所至多題詠渾灝流轉具不可羈勒之概所著手蹟甚多半經水沒又早卒未梓今僅存一二良可惜云

王衛板閘鎮圻人也爲人輕財尚義有昌黎所傳王承福之風乾隆四十一年歲暮卒業歸於路獲遺金十餘兩徘徊市上不去衆異而詢之亦不言日暮見有倉皇而來持楮帛禱於市之土地祠者詢得其情出金還之其人見其圻而貧也義之欲分金爲謝衛不顧而去

釋如安字心怡幼穎異涉獵儒書兼工鍾王善吟詠弱冠棄儒業祝髮大悲菴師古燈和尚參禪理究內典已而遠遊四方禮名山住少室三十年還淮郡守邵元哲更菴名爲通源寺刑部郎

周三錫爲建妙法堂郡守宋祖舜鄉人高登龍
爲置常住田接僧衆忽於新秋辟穀五旬端坐
示寂葬於寺之東以所著詩文印心錄藏於龕
釋傳悟號雪莊河北里人幼事南安老人詩畫與
童求柴邨齊名聞黃山之勝因往遊焉遍歷前
後海值雪大作七日厚十餘尺僵卧土神祠中
衆僧掃徑出之得不死因即其地剝木皮結棚
以居遠近聞而異之爭致薪米爲構精舍不處
終棲皮棚中人因號爲皮棚和尚康熙中 召
至京終日酣睡與人不交一言諸貴臣往候皆

以睡辭問其長曰善睡衆皆嗤之逾月放還山
道郭乾泗字羲一河北人丰神朗映珊珊有仙骨
工詩畫彈琴角奕皆極精妙尤善書筆力得淳
化神髓時有李半仙者異人也百餘齡步履如
飛郭師事之深得元解時當事欲以其名上聞
乃亡去後二十年返住持於古火星廟中年八
十餘無疾終

按淮安鈔關設自前明宣德四年則是編所載
斷應自明始而耳目所及人數無多未便再分
門類因祇就其時代之先後而次第之并附釋

道亦以備人物云爾

列女附

丁氏丁儒女金應試妻嫁未期年夫歿翁姑令其改適氏不從以翁無餘子廢簪珥爲翁置妾袁氏姑癡妬氏嘗泣諫及翁歿得遺腹子應彩姑亦歿袁尚年少能相與死守所居河北有大盜過其里相戒曰毋驚賢母比部周某給匾旌之

何氏本泗州人父早死母貧病無以自存有北通州人給母求爲介婦母不知而許之年十六歸其家尋徙居淮安之滿浦坊誘以爲娼氏

泣不從越數日留一賈人逼之氏不勝忿仰
天大泣以刀自刎血流滿地其家悉避去都
憲張敷華按其人不得以禮葬之時天久旱
或言何氏寃未雪郡守楊遜祭之果大雨後
推官馬駸建祠表墓額曰貞烈著在祀典每
年清明致祭墓在板閘新街通源寺西乾隆
三十九年水壞民居貞祠就圯烈女頗著靈
異今狗僧人悅賢之請重為脩建詳載在祠
墓

謝氏謝雱女孔椿妻年十九適椿明年椿卒生遺

腹子金姍戚勸之嫁遂自斷其髮鹽賈杜言
強娶之遂投淮水死屍逆水上行至烏沙河
烈女祠前止焉去椿墓不遠時仲夏逾旬顏
色如生及金長始白母寃推官曹于汴立祠
祀之魚紀以文

徐氏農家女質性純潔年十九歸大河衛軍申日
進三月進以挽漕如京師溺死於河氏傳聞
即晝夜哀哭數日粒米不入口後有人自京
寄還其夫之衣知為真死私念幼且無子守
亦無望乃竊衣夫之衣而襲以常服投河死

時人聞之無不酸鼻時都憲滕公昭以貞烈聞而未下郡侯楊景載其事於郡志學政莆田黃公如金以表勵風俗爲已任都憲沁水李公瀚告之以爲與何烈女齊名因並祀之顏其額曰雙烈推官馬駿爲之記祠二一在府治東數十步今廢一在河北西里詳祠墓

趙氏高九萬妻夫歿年二十六歲守節七十年卒知縣徐恕贈松節筠操額

楊氏張大經妻夫歿年二十八歲栢舟自矢翁姑年皆八十餘氏承顏養志甘旨不缺撫遺腹子嚴慈兼至俾克成立守節五十五年終乾隆三年旌表建坊板閘

秦氏劉希友妻夫歿年二十九歲守節五十三年乾隆三年旌表

張氏監生李睿妻夫故年二十九歲守節四十五年壽七十三卒乾隆四年旌表

時氏邱士璵妻夫歿年二十九歲守節二十八年乾隆六年旌表建坊河北

朱氏周念祖妻夫歿年二十七歲守節四十五年乾隆七年旌表

朱氏監生周延士妻夫故年二十六歲守節撫孤
至乾隆十二年旌表建坊板閘東街

楊氏張是妻夫歿年三十歲守節五十四年乾隆
十三年旌表建坊河北

陳氏陳大任女丁泰妻夫歿年二十八歲守節二
十八年乾隆十三年請旌建坊板閘

金氏毛天聲妻夫歿年二十四歲撫子尚炯成立
復亡以姪倫爲嗣苦節五十三年終

侯氏儀鳳閘民劉龍妻夫歿年二十八歲家貧守
節六十一歲病終

齊氏許字費朝元未嫁而元卒氏聞衰服赴喪次
不肯復歸紡績奉孀姑撫育嗣子守貞十八
年乾隆五年病終婢名才女隨侍守貞不嫁
現今六十七歲

王氏王邦賢女雍正四年許字席大朋未婚而大
朋病歿氏聞訃哀號矢志守貞誓不他適現
今年七十二歲

黃氏葉大本妻刲股救姑夫病復刲股療之晝夜
辛勤衣帶不解者三年夫歿年二十八歲家
貧撫孤備嘗艱苦守節四十五年終

丁氏周叔士妻夫故年二十九歲家貧勉力撫孤
歷盡艱辛卒俾成立苦節三十餘年蘓撫吳
給匾旌表

季氏周遠妻夫歿年二十六歲撫孤成立守節三
十餘年權使 給匾旌表

何氏丁慎妻夫歿年十九歲哀痛不欲生族人憐
而保護之伯氏守一嗣以次子芳家貧苦志
守節三十九年終

邱氏鄒致妻夫歿年二十九歲栢舟矢志事孀姑
以孝聞遺孤彭年方四歲辛勤誨育延師課

讀入郡庠守節三十餘年壽六十四歲終

金氏張長年妻適張方逾歲夫歿遺腹子亦夫亡
氏哀痛欲絕姑命以叔子光緒嗣之守節四
十餘年

劉氏丁魯南妻夫歿年十九歲苦節二十五年病
終

張氏陳廷謙妻夫歿年二十九歲苦節五十餘年
病終

康氏宿遷人幼許字同邑蔡曰哲乾隆十九年九
月氏年二十一歲曰哲病亡母兄匿不與聞

蓋欲緩以解之也未幾侍婢語洩不能隱而
氏轉若淡然處之母兄方以爲慰乃氏於十
二月十四日得信即於十五日夜作書貽其
幼弟叮嚀告誡惟以母爲念即勉弟處亦無
非欲其孝順與母爭光前後幾及四百字詞
雖叢雜情甚懇到讀之者莫不淚涔涔下而
更以我死也三字作起結心堅志決投繯自
盡哀哉其貞烈之操業於乾隆二十一年題
淮建坊旌表矣緣氏兄康泰及姪康靄俱充
宿關算書常赴淮輪辦公事是以知之甚詳

因特附載之

按婦人從一之義著於人心久矣然或年少
子幼遽失所天又復家貧親老以孑孑一身
仔肩仰事俯畜之事雖茹荼含藥備極人世
所難堪而卒能完名立節於艱難困苦之中
豈不偉哉他若許字未嫁甘心守節以處子
而克敦婦道尤足多也甚且變生意外強暴
侵凌而義激於中視死如飴其烈更可嘉尚
故就所知而連類并列之其非鄰近者概不
及也

淮關志卷之十三終



